

# Statuts da la Conferenza svizra dals recturs da las scolas autas pedagogicas (CSSAP)

## I. EN GENERAL

### Art. 1 *Num*

Sut il num „Conferenza svizra dals recturs da las scolas autas pedagogicas“ (CSSAP) s'associeschan las recturas ed ils recturs da las scolas autas pedagogicas chantunalas ed interchantunalas per constituer ina conferenza interchantunala, cun sedia a Berna, en il senn da l'art. 23 dals Statuts da la Conferenza svizra dals directurs chantunals da l'educaziun publica (CDEP) dals 2 da mars 1995.

### Art. 2 *Finamiras ed incumbensas*

#### La CSSAP

- a. represchenta las scolas autas pedagogicas sco era las instituziuns en il sector terziar cun sumegliantas incumbensas. Ella represchenta damai ils interess da la furmaziun da scolastas e scolasts visavi las autoritads politicas, las organisaziuns pedagogicas, socialas, culturalas ed economicas e visavi la publicitad, applitgond e sviluppond vinavant las recumandaziuns da la CDEP dals 26 d'october 1995 davart la furmaziun da scolastas e scolasts. Ella è partenaria da la Conferenza svizra dals recturs da las universitads svizras (CRUS) e da la Conferenza svizra da las scolas autas professionalas (KFH);
- b. promova la fundaziun, la coordinaziun ed il svilup da las scolas autas pedagogicas e sustegna lur integraziun en il sistem da las scolas autas;
- c. furma ina plattafurma naziunala per il barat d'infurmaziuns e d'experienceschas da las persunas responsablas per la direcziun da las scolas autas pedagogicas;
- d. sustegna la coordinaziun e la cooperaziun interchantunala sin il nivel da la furmaziun da scolastas e scolasts da tut ils stgalims, tegnend quint da la sensibilitad e da las particularitads da las diversas regions linguisticas;
- e. procura per la collavuraziun en il sector dal management da la qualitad;
- f. cusseglia la CDEP en tut las dumondas da la furmaziun da scolastas e scolasts, elavura posiziuns, surpiglia incumbensas da represchentaziun en Svizra ed a l'exteriur ed exequescha mandats da la CDEP;
- g. promova il svilup e la realisaziun d'ina didactica dal stgalim terziar che garantescha ina furmaziun da scolastas e scolasts orientada vers il futur;
- h. sustegna la furmaziun fundamentala e la furmaziun cuntinuada da las docentas e dals docents sco era la mobilitad da docentAs e studentAs;
- i. surpiglia la conresponsabladad per la tgira dal maletg da la professiun e da sia percepziun en la publicitad;
- j. promova ils contacts ed il barat d'infurmaziuns cun instituziuns da furmaziun da scolastas e scolasts a l'exteriur;
- k. prenda posiziun visavi la publicitad davart dumondas specificas che pertutgan la coordinaziun tranter las scolas autas;<sup>1)</sup>
- l. s'engascha per la renconuschientscha vicendaivla da studis gia absolvids en ina scola auta;
- m. collavura cun autras organisaziuns activas en il sector da la furmaziun.

<sup>1)</sup> Midadas dals 10 november 2004; entrada en vigur ils 8 avrigl 2005

### Art. 3 *Commembers da la Conferenza*

- 1 Las recturas ed ils recturs (directuras e directurs operativs) da las scolas autas pedagogicas èn ex officio commembers da la CSSAP cun dretg da votar.
- 2 Sch'in chantun maina duas scolas autas pedagogicas, han ils dus recturs da quellas mintgamai ina mesa vusch.
- 3 Sche la furmaziun da scolastas e scolasts vegn affidada per part u entiramain ad in'universidad, numna quella tranter ils responsabels principals ina persuna sco commember da la CSSAP. Il dretg da votar vegn reglà da l'assemblea plenara cun la maioritad da dus terzs da tut ils commembers e conform als alineas 1 e 2.
- 4 Las recturas ed ils recturs d'autras instituziuns da furmaziun da scolastas e scolasts dal stgalim terziar pon vegnir recepids en la CSSAP cun la maioritad da dus terzs da tut ils commembers. L'assemblea plenara reglescha medemamain la dumonda dal dretg da votar conform als alineas 1 e 2.
- 5 Ils commembers da la CSSAP exerciteschan lur mandat personalmain.

## II. ORGANISAZIUN

### Art. 4 *Organs*

Ils organs da la CSSAP èn:

- a. l'assemblea plenara
- b. la suprastanza
- c. il secretariat

#### **A. Assamblea plenara**

### Art. 5 *Organisaziun*

- 1 L'assemblea plenara sa raduna almain trais giadas l'onn. Ella vegn convocada da la presidenta u dal president da la CSSAP. In quart dals commembers po pretender la convocaziun d'ina radunanza extraordinaria.
- 2 La presidenta u il president e la vicepresidenta u il vicepresidente represchentan regiuns linguisticas differentas.
- 3 La secretaria generala u il secretari general da la Conferenza sco era ina delegaziun dal secretariat da la CDEP participeschan cun vusch consultativa a las radunanzas da l'assemblea plenara. Els han il dretg da far propostas.
- 4 L'assemblea plenara è cumpetenta da decider, sche la maioritad dals commembers è preschenta. Ella prenda sias decisiuns cun la maioritad simpla dals commembers preschents. La presidenta u il president votescha era. En cas da paritad da las vuschs dat ella u el la vusch da tagl. Per midadas dals statuts dovri dus terzs da las vuschs.
- 5 En cas excepziunals pon las decisiuns vegnir prendidas per corrispondenza.

### Art. 6 *Incumbensas*

L'assemblea plenara ha oravant tut las suandantas incumbensas:

- a. tractar las fatschentas suttamessas da la suprastanza;
- b. decider davart il program d'activitads;
- c. approvar il preventiv ed il quint per mauns da la suprastanza da la CDEP; <sup>2)</sup>
- d. approvar il rapport annual;
- e. eleger la suprastanza, la presidenta u il president e la vicepresidenta u il vicepresidente da la Conferenza;
- f. deliberar davart fatschentas suttamessas a la Conferenza per prender posiziun;
- g. decider davart la recepciun da novs commembers e reglar en quest connex la dumonda dal dretg da votar;
- h. decider davart l'installaziun da cumissiuns e da gruppas da lavur permanentas (era na-commembers da la CSSAP pon far part da quellas) e fixar lur incumbensas;
- i. eleger la secretaria generala u il secretari general;
- j. decider davart midadas dals statuts per mauns da la suprastanza da la CDEP.

---

<sup>2)</sup> Midadas dals 10 november 2004; entrada en vigur ils 8 avrigl 2005

## **B. Suprastanza**

### *Art. 7 Organisaziun*

- 1 La suprastanza sa cumpona da tschintg commembers elegids per ina durada d'uffizi da dus onns. Ina reelecziun è pussaivla. La Svizra romanda ed il Tessin han il dretg a duas sedias.
- 2 La suprastanza sa constituescha sezza. Ella vegn manada da la presidenta u dal president da la CSSAP u, en cas d'impediment, da la vicepresidente u dal vicepresidente. Ella u el convochescha la suprastanza tenor basegn. Trais commembers da la suprastanza pon pretender la convocaziun d'ina radunanza extraordinaria.
- 3 La suprastanza è competenta da decider, sche la maioritad dals commembers è preschenta. Ella prenda sias decisiuns cun la maioritad simpla dals commembers preschents. La presidenta u il president votescha era. En cas da paritad da las vuschs dat ella u el la vusch da tagli.
- 4 En cas excepziunals pon las decisiuns vegnir prendidas per corrispondenza.
- 5 La secretaria generala u il secretari general da la Conferenza sco era ina delegaziun dal secretariat da la CDEP prendan part cun vusch consultativa a las sedutas da la suprastanza. Els han il dretg da far propostas.

### *Art. 8 Incumbensas*

La suprastanza ha las suandantas incumbensas:

- a. manar las fatschentas da la Conferenza;
- b. decider davart l'installaziun da gruppas da lavur e da gruppas d'expertas e d'experts betg permanentas (era na-commembers pon far part da questas gruppas) e determinar las incumbensas da quellas;
- c. eleger las collavuraturas ed ils collavuradors dal secretariat;
- d. exequir tut las incumbensas resp. prender decisiuns che n'èn betg attribuidas explicitamain a l'assemblea plenara.

## **C. Secretariat**

### *Art. 9 Secretariat*

Il secretariat da la CSSAP ha sia sedia a Berna. El vegn manà en cunvegientscha e cun il sustegn administrativ dal secretariat da la CDEP sco era en collavuraziun cun ils secretariats da la Conferenza svizra da las scolas autas professiunalas (KFH) e da la Conferenza dals recturs da las universitads svizras (CRUS).

## **III. DISPOSIZIUNS FINALAS**

### *Art. 10 Finanziaziun*

- 1 La CSSAP vegn finanziada dals organs responsabels da las scolas autas pedagogicas tenor il dumber da la populaziun dals chantuns pertutgads.
- 2 La suprastanza da la CDEP fixescha las contribuziuns finanzialas dals commembers conform a l'art. 3, al. 3 e 4.
- 3 La CDEP sa participescha a las expensas, oravant tut cun prestaziuns d'infrastructura.
- 4 La CSSAP agescha autonomamain en il rom dal preventiv approvà.

### *Art. 11 Disposiziuns transitorias*

Ils responsabels da project sin nivel chantunal u regiunal ch'han l'incumbensa da fundar scolas autas pedagogicas, da las qualas las rectoras u ils recturs n'èn però betg anc elegids u en uffizi, èn commembers da la CSSAP.

Art. 12 *Entrada en vigur*

Quests statuts entran en vigur suenter ch'els èn vegnids approvads da las participantas e dals participants da l'assemblea dals 18-1-2002 e da la suprastanza da la Conferenza svizra dals directurs chantunals da l'educaziun publica (CDEP).

Berna, ils 18 da schaner 2002

Conferenza svizra dals recturs da las scolas autas  
pedagogicas (CSSAP)

Il president dal di      Il secretari dal di

Andrea Jecklin      Alexandre Etienne

Approvà da la suprastanza da la CDEP ils 3 da matg 2002  
Midadas approvadas da la suprastanza da la CDEP ils 8 avrigl 2005